

NWER NYI POL NYONO TV ANEB ERO BA LI GO GALESA

¹ Me Pol wo ji li ntiingetib no nne ki-m tum. Jisos Kraist, a Esowo Nsoo bi nyahm-e go elkv, bo ba tum-m. Bo sehngem goji nne.*

² Me, a abonanee kpee ba li a name, e kp'kake aneb ero ba li go Galesa nnyo.

³ Nong, nnoobo, a elkoono jol a nahne, ni lohng goji Esowo Nsoo, a Jisos Kraist Ntul ewahre,

⁴ no yake elne ka tib go egahre abiafem, eji á l'tahr-r yehke go ebi eying jia ji anv, tib ana wo koro Esowo Nso ejahre.

⁵ Nong, ellub jol n'ne go njinanjini. Emen

Nnoobo etib bi Esowo li na abehng

⁶ Kp-m kpoko esi sehng, eji m ma tahr y'yake ye ji lung-n no re wahn toono nnoobo nyi Kraist, m ma fere yaange kp'toono etib bindiki.

⁷ Lohngem re nnoobo etib bindiki bia. Ane bandiki ba kpo lim re amahr jo bil-n, bo ba kp'sebe re bo yaange nnoobo etib bi Kraist.†

⁸ L'fere jol wahr, afi fere jolo enjel nyi lohng go ejahbetul Esowo ba tiing-n etib bindikandiki bi ki li jang jang ana bi e tiing-n no, nkuk a ne!‡

⁹ Ana e ma tohko bung, ano wo n kp'kpeke bung a. Nne awohng awohng no l'fere tiing-n etib bi ki li ana bi m ma tohko taame tv, nkuk a ne!§

* **1:1 1:1** Gal 1:11-12 † **1:7 1:7** Elt 15:1,24 ‡ **1:8 1:8** 1 Kor 14:37

§ **1:9 1:9** Ell 22:18-19

¹⁰ Anv, n kp'sebe re me n jol ntem no anea, afi ntem no Esowo? Anv, n kp'sebe re me n lim ji kp'koro anea afi? Li re n kp'kpeke lim ji kp'koro ane, kehn me nlokeltum no Kraist sang.*

Ana Pol kehm jolo ntiingetib no Esowo

¹¹ Abonanee, n kp'sebe re wahn kahn re, nnoobo etib bi n tiingi no, bi nne sang.

¹² N koom goji nne, jol nne sang tib-m no. Jisos Kraist antahng antahng wo lennge no ka-m.†

¹³ Tibre wahn ebwuk bade ana elkpin ename jolo no, eji n jo toono eljini nio ni Jus, ana n jo sahb n'nohk aneb Esowo, fere jo gare re me n tane ero.‡

¹⁴ Me wo jo ga toono eljini ni Jus sehng ane ebame bako gbalee, ba e jolo nkpake anyehng ano a bo, eji n jo sahb k'kak ekpuku, jo toono eltibi ni babnso ejahre.§

¹⁵ Esowo yehk-m ngare nyi n kpeke wob nnee go ala, fere lung-m go ege a nnoobo re me m ba lok-e.

¹⁶ Wo, eji kor-e no re á lennge mmon ewe ka-m,* eji n l'song tiingi nnoobo etib bada ne go ellong ane baka baka,† n jeem goji nne awohng awohng re me n song ko elle.

¹⁷ Jol n jeem go Jeusalem goji ane ba gbo mbang jol abatiingetib ka me. N tahme ejame, song rehng go Arebia, kehm feere song rehng go Damaskus.

* **1:10 1:10** Luk 6:26; 1 Tes 2:4 † **1:12 1:12** Gal 1:1; 2 Kor 12:1-3

‡ **1:13 1:13** Elt 9:1-2 § **1:14 1:14** Elt 22:3-5; 26:4-5 * **1:16 1:16** Mat 16:17 † **1:16 1:16** Elt 26:13-18

18 Eji ma kang nnya era, n kehm tahme go Jeusalem, eji n l'song mahnge Pita. Eji n je no, n kange a ne nfung elku.

19 N kpeem nyehn ntiingetib awohng awohng gona, sehngem Jems mmonannyeahn Ntul a Jisos wo n nyehne-e no.‡

20 Ji n kp'nyono a, n kp'nyono go esamahr bi Esowo. Efahnge n nehme kim.

21 Owo n kehm tahme go ejang bi Siria, a bi Silisa.

22 Ngare nyio aneb ero ba li go Judea ba ma taame tv Kraist m-e ka nyehn a nyehn.

23 Bo wuku na wuk ji ane bako jo bung re, “Nne no jo nohk-r wuku wuku, anv, á kp'fere tiingi nnoobo etib re ane taame tv Jisos, Jisos jio ji á jo gare wuku wuku re, á tane ero ebe.”

24 Bo kehm kehme Esowo ellub ka tib me.

2

Pol, a abatiingetib bako

1 Eji ma kang ewubu a nnya eni, n kehm kpe je go Jeusalem, a Barnabas. N tob ko Taitus fvfo, je a ne.*

2 N je, tib eji Esowo lennge ka-m re me n je. Eji e song kono edi ajehng a atubesi ero wahr wahr, owo n kehm tooro tong bo ana nnoobo etib bi n jo tiingi ane baka baka li no. N joom seb re eltum ni n jo lim wuku wuku, a ni n kp'limi anv jol mbol mbol.†

3 Jol Taitus ji jolo a name, bo we bobem re á yehke nrur, jol eji á jolo jol nne a Grik.‡

‡ 1:19 1:19 Mat 13:55 * 2:1 2:1 Elt 15:2 † 2:2 2:2 Mat 18:18

‡ 2:3 2:3 Elt 16:3

⁴ Akimfahnge abonanee bandiki jo sebe re bo lim ano. Bobweele ba yel re bo ba seb kahn elkohn elforo ni e ma for go ejang bi Kraist Jisos,§ eji bo l'lim-r, e jol aju.

⁵ Jol e tikem naange tv bo nkpel anyehng anyehng, tib eji e l'kuuru etingitingi jio ji nnoobo etib bum-n.

⁶ Ane bandiki baa, ba bo jo bum bo ana atubesi. Jol afi bo jolo elkohn ani, m-e nehme lub. Tibre Esowo kpehme rang nne awohng awohng. Jol atubesi bao m-e tibem ejumjum budu.

⁷ Bo sebe na kahn re, Esowo ebyake nnoobo etib ka-m re me n song tiingi ane ba kil jo yehke nrur,* jang jang ana á yake nnoobo etib ka Pita re á jo tiingi ane ba kpo yehke nrur.†

⁸ Tibre ye jio ji jo lim eltum a Pita, eji Pita jo tiingi ane ba kpo yehke nrur nnoobo etib,‡ ye j'nehm wo jo tob lim eltum a name, eji n jo tiingi ane baka baka nnoobo etib.§

⁹ Eji Jems, Pita, a Jon, ba bo bumu bo ana atubesi nyehne nnoobo nyi Esowo ma lim ka-m, bo kehm kake Barnabas a me ebo bi elkoono. Owo e kehm toobo re wahr bahke jo lim eltum go ellong ane baka baka, bo jo lim eltum go ellong ane ba kpo yehke nrur.

¹⁰ Ejum jia ji ji bo tong-r no re wahr jo buumu akpak ebo. Ejum j'nehm ana ji n jo nok re me n lim.*

Ana Pol nyame Pita go Antiok

§ 2:4 2:4 Rom 10:4; 13:10 * 2:7 2:7 Elt 22:21 † 2:7 2:7 Luk

22:32 ‡ 2:8 2:8 Elt 9:34,40 § 2:8 2:8 Elt 13:11-12; 19:11-12

* 2:10 2:10 1 Kor 16:1-4

¹¹ Eji Pita ba go Antiok, n ka-e ebi go elkab ane, tibre á s'soodo.

¹² Re ane ba Jems tumu no kehm ba rehng go Antiok, Pita jo li nsol a ane baka baka. Eji bo ba no, á kehm yabe elne, á kpeem tiki jo li nsol a bo, tibre á jo fahle ane ba jo seb re ane baka baka tob yehke nrur.†

¹³ Erik Jus jehko ji jo toono Pita, jo t'tob lim awini. Barnabas fvfo, awini nyanehm nya tob wer-e.

¹⁴ Eji n sebe kahn re, bo nehme jen go nseenge, fere jo toono etingitingi nnoobo etib, owo n kehm bungu tong Pita go esamahr ane bao kpee re, “Wo ji li na nne a Jus, a l'fere jo lim eljini ni ane baka baka, k'kpe jo lim eljini ana ni nne a Jus, anv, a bahke ma bob ane baka baka renan, bo kehm limi eljini ni Jus?”‡

¹⁵ Wahrfono antahng, wahr Jus ji dahb dahb dahb. Wahr ane baka baka sang, ba li aneb abiafem.

¹⁶ Wo, e kp'kahne re, nne kpehme li eno go esamahr bi Esowo tib go atahm abumu, sehngem re no, á l'taame tv Jisos Kraist. Jol wahr jia fvfo, wahr ebtob taame tv Jisos Kraist, eji e l'li eno go esamahr bi Esowo tib go eltaame ni e ma taame tv Kraist, limm go atahm abumu. Tibre nnene limm, no bahke ma li eno tib go atahm abumu.§

¹⁷ E l'gare re wahr li eno go esamahr bi Esowo, tib eji e ma taame tv Kraist, bo fere jo tong-r re, wahr aneb abiafem ba, anv, jia lohngo re Kraist nlokeltum no abiafem woa? E'ee, ano á limm!*

† 2:12 2:12 Elt 11:1-3 ‡ 2:14 2:14 Elt 15:7-11 § 2:16 2:16 Rom

3:20,28 * 2:17 2:17 Mat 5:17

18 N l'fere kpe kehme atahm jehke, nya m ma range, mbang nyio me n tib elname ana ngbokatahm.

19 Wahr ebmal a atahm.† Tibre atahm nya wahnge n kpo no, eji n l'kpin ka Esowo.

20 Bo ma-m kum lake go ekros a Kraist. Mefono antahng sang kpeke li go elkpin, Kraist wo li go elkpin go egame atahng. Elkpin ni n li a ni anv go egama ngubjing, n'nehm ni m ma ko kp'jene go mbang nyi Mmon Esowo no n kor-e no, á ba yake elne ka tib go egame esi.

21 N kpehme ten nnoobo nyi Esowo. L'jol re nne kpo li eno go esamahr bi Esowo tib go atahm abumu, lohngo re, elkv ni Kraist kpo no, á kpo mbol mbol.

3

Atahm abola eltaame

1 Wahn aneb Galesa, jen ji wahnge n kp'gboolo ano? Nne awo ma-n nehm,* wahn ji m ma-n tib Jisos Kraist, á ma fere jol are bo kum-e go ekros go egahne esamahr?

2 Ejum ajehng ji ji n kp'sebe re wahn tong-m. Anv, m bele Etingi Etohko tib eji n jo bum atahma, afi eji n wuku alum Esowo, fere taame?†

3 Jen ji wahnge m ma gboolo ano? M bomo gona etohko, anv, n kp'sebe re wahn gohro lim go egahne ekoa?‡

4 Anv, erem bi m ma nyehn o, n nyehne mbol mbola? Li ma jol mbol mbol.

† 2:19 2:19 Rom 7:6 * 3:1 3:1 Kol 2:16 † 3:2 3:2 Elt 10:44

‡ 3:3 3:3 Hib 10:28-29

⁵ Wo anv, eji Esowo ma-n ka Etingi Etohko, fere kp'limi akpokosi go egahne ellong, á kp'limi ano tib eji n kp'bumu atahma, afi tib eji n kp'wuku alum Esowo, fere taame?

Elfuulu ni Ebrahim

⁶ Nwer Esowo bungu bade Ebrahim re, “Á taame tv Esowo, owo Esowo ko-e ana nne no ma li eno.”§

⁷ Nobo re wahn kahn re, ane ba kp'taame tv Esowo ba li abon ba Ebrahim.

⁸ Alum Esowo tohko nyehn amahr, ngare kehm rehng re, Esowo bahke koko ane baka baka ana ane ba ma li eno tib go bo eltaame. Á tohko tiingi Ebrahim nnoobo etib re, “Elfuulu ni ane kpee ba li go njini bahke bele, bahke sehng go ega.”

⁹ Owo fvfo, ane ba kp'taame tv Esowo ma bel elfuulu a Ebrahim ji tob taame.

¹⁰ Tibre ane kpee ba ma tahm tonngo go nsol nyi bo kp'limi, eji bo kpi atahm bum, bobbel nkuk. Tibre nwer Esowo bungu re, “Nne awohng awohng no tohko jo lim nsol kpee nyi bo nyono go nwer atahm, yebbel nkuk.”*

¹¹ Anv, ebsahb l'lenng re, nne nehm ma li eno go esamahr bi Esowo tib eji á kp'bumu atahm. Tibre nwer Esowo bungu re, “Nne no ma li eno bahke jolo go elkpin tib go ege eltaame.”†

¹² Atahm kpehme tonngo go eltaame. Tibre nwer atahm bungu re, “Nne no l'lim ejum ajehng ajehng ji atahm bungu no, á bahke kpini tib eji á ma lim ano.”

§ 3:6 3:6 Rom 4:21 * 3:10 3:10 Jems 2:10 † 3:11 3:11 Rom 1:17

¹³ Kraist wo ma-r fak yake go nkuk nyi ntahm ko no ba ka-r, eji á jolo ejum nkuk tib go egahre esi. Tibre nwer Esowo bungu re, “Nkuk li a nne awohng awohng no bo tohk-e go eti.”[‡]

¹⁴ Kraist taame, jol ejum nkuk, eji ane baka baka l'bel elfuulu ni Ebrahim ni li Jisos, eji wahr l'bel Etingi Etohko ji Esowo nyame no re á bahke kake ane ba l'taame.

¹⁵ Abonanee, nong, me n lim ntugare nyi li feere go eyaame ji nne. Nne l'si g'gahm nne no bahke lehke elkv ene, fere tob lim ane bako kahn, nnene limm, no bahke ma ten alum nyao, jol nnene limm, no bahke ma budu.

¹⁶ Esowo nyame enyam bia tong Ebrahim, fere tong mmon ewe. Esowo bungem re, “Abon ebe,” ba kehn jol tibi re bo li gbalee. Á bungu bada nne na awohng noo re, “Bahke jolo ka mmon ewa,” no li Kraist.

¹⁷ Ejum ji a, ji n kp'bungu. Atahm nya ba na, eji ma kang nnya atahltahl kunu eltahl a nnya ewubu nehm ma sahde ntoobo nyi Esowo toobo no wuku wuku bum, nyi á ma lim re yiimi. Atahm nehm ma lim re, ji Esowo nyame no kane.

¹⁸ L'jol re atahm nya bahke wahnge nne bel nsol elehke elkv nyi Esowo, lohngo re á nehm bel tib go enyam bi Esowo. Esowo k'ka Ebrahim elfuulu nio, tibre á nyame na tong-e re á bahke bele.

Anv, atahm lohngo renan?

¹⁹ Jen ji wahnge atahm li li? Esowo budu atahm tib abiafem,§ eji atahm l'jol tete ba rehng ngare nyi mmon no Ebrahim noo bahke bake, ye ji

[‡] 3:13 3:13 Rom 8:3; 2 Kor 5:21 § 3:19 3:19 Rom 3:20; 5:20

Esowo nyame tong-e re, á bahk-e fuulu.* Esowo yake atahm ka babenjel re bo ko ba a nya, nya sehngé go abo nya nne no yiimi go elka elka ni Esowo, a ane.†

20 Njahm ebal ebal tohko jol, nne nehm ma yiimi go elka elka. Fvfo, Esowo li na abehng.‡

21 Anv, atahm kpehme koono a enyam bi Esowoa? E'ee.

Li re Esowo ka atahm nya bahke ma ka ane elkpin, kehn ane bahke lehke eno tib go atahm abumu.§

22 Wo, nwer Esowo bungu re, njini kpee wob go elwo ni abiafem, eji ane ba kp'taame tv Jisos Kraist l'bel ji Esowo nyame tong ane ba ma taame.*

23 Re eltaame kehm bake, e woomo go ng-bekobo nyi atahm, nya gbaang-r no tete ngare biingi nyi Esowo lennge eltaame tib.

24 Atahm nya jolo ana nt'tibi ewahre, tete Kraist ba, eji e l'li eno tib go eltaame.

25 Anv, eji eltaame ma ba, e kpeem wob go elwo ni nt'tibi noo.†

26 Tibre wahn kpee, abon Esowo ba, tib go eltaame ni n kp'taame tv Jisos Kraist.‡

27 Tibre nne awohng awohng ewahne no ma bel ewohngalahb, fere jol ajehng a Kraist, yebrod Kraist kak ana ewobo.

28 Anv, elyaange anehng anehng kpeem li, afi jolo anebe Jus, afi fere jolo ane baka baka, afi jolo aju, afi fere jolo ane ba ki li aju, afi jolo aneblum,

* **3:19 3:19** Gal 3:16 † **3:19 3:19** Elt 7:53; Hib 2:2 ‡ **3:20 3:20**
 Jon 1:17; 10:30 § **3:21 3:21** Rom 8:2-4 * **3:22 3:22** Rom 3:19;
 11:32 † **3:25 3:25** Rom 10:4 ‡ **3:26 3:26** Jon 1:12

afi fere jolo anebkal, wahn kpee li ajehng a Kraist Jisos.§

²⁹ N' l'jol ka Kraist, n tob li abon ba Ebrahim, a abalehkelkv ana Esowo nyame no.

4

Alokeltum, a abon

¹ Ejum ji n yahke ba elbundu ji a. Eji nlehelkv kpeke li mmonse, elyaange anehng anehng bo kpimm, ye a nlokeltum, jol eji ye li li nfona nsol nyio kpee.

² Nlehelkv kpo woomo go elwo ni ane ba kpo fil-e, fere woomo go elwo ni ane ba nsol enye wob bo go ebo, tete afung biingi nya nde kunu no.

³ Ano wo tob li kak awahr awahr fvfo. Eji e jolo abonse,* e jolo aju nya atohko nya kpo fili njini.†

⁴ Wo, eji afung nyao biingi no,‡ Esowo kehm tumu Mmon ewe. Nnenkal wo jel-e, á fere woomo go elwo ni atahm,

⁵ eji á l'fak ane ba wob go elwo ni atahm yake, bo fere jol abon ba Esowo.

⁶ Tib eji e li abon ebe, owo wahnge Esowo kehm tumu etohko ji Mmon ewe tv-r, ba yel go egahra ntim, ji kpo rabe re, "Abba, Nsoo!"§

⁷ Anv, eji Esowo ma-a lim re, wo k'kpe jol nlokeltum, wobfere jol mmon. Eji a ma fere jol mmon, wobtob jol nlehelkv no Esowo.

Ana Pol jo tiiri aneb Galesa

§ 3:28 3:28 Rom 10:12; 1 Kor 12:13 * 4:3 4:3 Gal 3:23-25 † 4:3 4:3 Kol 2:8,20 ‡ 4:4 4:4 Ef 1:10 § 4:6 4:6 Rom 8:15

⁸ Wuku wuku eji n̄ kala kahn Esowo, n̄ jolo aju nya nsol nyi Esowo limi no, nyi ki li yefono Esowo.

⁹ Anv, eji m̄ ma kahn Esowo, kehn n̄ jol bungu re, eji Esowo ma-n kahn, jen ji wahnge m̄ bahke kpe feere goji atohko nyao nya ki kpi nsahm, nya ma gbo ekpak? Jen ji wahnge n̄ kp'sebe re wahn kpe feere jol aju ebo?*

¹⁰ N̄ kpo bum akahmekahme afung, fere jo bum akahmekahme anyahng, fere bum ekahmekahme ngare, a akahmekahme nnya.†

¹¹ N kp'fahle re, eltum ni n̄ limi go egahne, n̄ limi na tane.‡

¹² Abonanee, n̄ kp-n̄ gboongo re, wahn fere jol ana me, tibre me n̄ tob li ana wahn.§

Eb'bi ajehng ajehng me n̄ limem.

¹³ N̄ kp'kahne re, ngare nyi n̄ gbo mbang bung alum Esowo tong-n, n̄ jo y'yam.*

¹⁴ Eyam ebame bio jolo ana ejum elgaare ka wahn, jol tvtv ona m̄ m-e daangem, fere ten-m. N̄ ko-m ana enjel nyi Esowo, fere ko-m ana Kraist Jisos antahng antahng.

¹⁵ Anv, eyebatahng ji m̄ bele no je gan? N kp-n̄ yiimi ntianse re, ki ga ga, kehn n̄ jol luudu amahr enyahne ka-m.

¹⁶ Anv, me n̄ fere jol nnekv ewahne, eji n̄ kp-n̄ tongo etingitinga?

¹⁷ Bo kp'sahb n'nok re bo lim etem a nahne, jol bo nehme lim go ntir atahng nyi nno. Tibre bo

* 4:9 4:9 Gal 4:3 † 4:10 4:10 Kol 2:16 ‡ 4:11 4:11 2 Jon 8
§ 4:12 4:12 1 Kor 9:21 * 4:13 4:13 1 Kor 2:3

kp'sebe re bo yaam-r a nahne, eji wahn l'tob lim etem a bo.†

18 N'nob re bo jo nok, lim etem ngare anyehng anyehng, jol afi n jolem ona, bo l'soro l'lim go ntir atahng nyi nno.

19 Abon ebame, n kp'kpeke rahng ejel ebahne,‡ tete Kraist gbal go egahne atahng.

20 Kp-m koro re me n jol a nahne anv, fere bung a nahne go mbang nyindiki. Tibre ji n wuku bada nahne ma-m fohk nkV.

Hegar abola Sera

21 Tong-m wahn ana atahm bungu no, wahn jio ji kp'sebe re wahn kpe woomo go elwo ni atahm! N' nehme wuk ji atahm bungu noa?

22 Nwer Esowo bungu re, Ebrahim bele abon ba nlum na abal. Noko, nju nyi jel-e, noko, nnenkal no ma for wo jel-e.

23 Mmon no nju nyio jel-e no, á jel-e go mbang nyehka nyehka. Wo, mmon no nnenkal no ma for jel-e no, á jel-e tib go enyam bi Esowo nyame no tong-e.§

24 A wo li ntugare nyi tib-r ejum. Tibre anebkal abal baa yim go egbanngalung ebbal. Hegar yim go egbanngalung ji Esowo limi a abone Hegar go ewong ji bo kpo lung re Sainai, egbanngalung jio ji limi bo, bo jol aju.*

25 Tibre aneb Arebia kpo lung Sainai re Hegar, ji kp'tibi Jeusalem ji li lela, ji li nju, a abon ebe kpee.†

† 4:17 4:17 Gal 1:7 ‡ 4:19 4:19 1 Kor 4:15 § 4:23 4:23 Rom 9:7-9 * 4:24 4:24 Rom 8:15 † 4:25 4:25 Luk 2:38

²⁶ Jeusalem ji li go ero ebfor, ji ji li nnee ejahre.‡

²⁷ Tibre nwer Esowo bungu re,
“Bel eyebatahng, wo ngum a nnenkal no kil jele
abon.

Fa asol kak, wo fere siiki, wo jio ji kala r'rahng
ejel.

Tibre nnenkal no nlum ewe m-e tahm sa wo
ga kpi abon sehng e nnenkal no kpi nlum.”§

²⁸ Abonanee, e li abon Esowo ana Aisik, tib
enyam bi Esowo nyame no.

²⁹ Ana jolo ngare nyi mmon no bo jel-e go
mbang nyehka nyehka jo nohk mmon no bo jel-e
go etohko ji Esowo, ano wo tob li anv.*

³⁰ Wo anv, nwer Esowo bungu renan? Bungu
re, “Kam nju nyio, a mmon ewe! Tibre mmon no
nju nehm tiki li elkv ano a mmon no nnenkal no
ma for jel-e no.”

³¹ Abonanee, wahr abon ba nju sang, e li abon
ba nnenkal noo no ma for.

5

Ana Kraist ma-r lim, e ma for

¹ Yiimen go elforo ni Kraist ma-n lim, m ma for.
Kana kpe taame, kpe jol aju.*

² Me Pol, me wo kp-n tongo re, N l'taame re bo
yehk-n nrur, lohngo re, Kraist, nnoobo anyehng
anyehng wahn á nehm ka.

³ N kp'kpeke bung tong nne awohng awohng
no l'taame, bo yehk-e nrur re, á bahke tiki bum
atahm kpee.

‡ 4:26 4:26 Hib 12:22 § 4:27 4:27 Mak 2:20; Ell 7:9 * 4:29 4:29

Elt 17:13 * 5:1 5:1 Kol 2:16

⁴ Wahn jia ji kp'sebe re wahn li eno go esamahr bi Esowo tib go atahm abumu, wahn ebyaame a Kraist, fere yake nnoobo nyi Esowo.

⁵ Tibre go nsahm Etingi Etohko, a eltaame ni e kp'taame tv Jisos e kp'siki ji e kp'kunu ekpu, ji li eno ji e bahke lehke go esamahr bi Esowo.

⁶ Go ejang bi Kraist, afi nne yehke nrur, afi á yehkem, nsehng anyehng anyehng limm. Nsehng li go eltaame ni nne kpo taame tv Jisos, eji á kp'limi ejum ajehng ajehng go elkoro.[†]

⁷ N̄ jo limi nob nob. Nne awo kpan-n re wahn k'kpe toono etingitingi mbang?

⁸ Ane ba kpo nok re bo senng-n eltim, alum nnyo ebo lohngem goji Esowo bi kp-n lungu.

⁹ Abon ayist ntiil kpo lim ebred kohro kohro tung.[‡]

¹⁰ Tib eji e li ajehng a Ntul a Jisos, owo wahnge n kp-n bumu go etingitingi re, n̄ nehme tir ejahne ejahne, me n tir ejame ejame. Wo, nne no l'lim re, amahr bil-n, Esowo bahk-e kake erem, afi á jolo elkohn nne awo.[§]

¹¹ Abonanee, li re n kp'kpeke bung alum Esowo nyao nya nrur ayehke, kehn bo m-e nehme kpe nohk. Li re n kp'kpeke lim ano, kehn ekros ji Kraist ji n kpo bung alum Esowo bade, nehme kpe jol ana esiti mbang.*

¹² Kor-m kor re, ane ba kpo lim re, amahr bil-n, bo tob fang elbo.

¹³ Abonanee, Esowo lung-n re wahn for. Kana rod elforo ni m̄ ma for bum ana ejum ji m̄ bahke

[†] 5:6 5:6 1 Kor 7:19 [‡] 5:9 5:9 1 Kor 5:6; Mat 16:12 [§] 5:10 5:10
2 Kor 11:15 * 5:11 5:11 1 Kor 1:23

jo laange kunu, fere jo lim ji kp'koro agubjing enyahne. Ga nob re wahn bel elkoro atemtem, eji n l'jo loko atemtem.[†]

¹⁴ Tibre nne no l'bum ellum nia ni bungu re, “Nne ebjing ewa jo kor-a ana ebjing eba,” á li nne no ma bum atahm kpee.

¹⁵ N l'jol ana enyam bi kpo tokko atem, fere jo mele atem, jo kunen ekpu, eji n l'k'ranng e atemtem.

Etohko, a ngubjing

¹⁶ Ji n kp'bungu a li re, wahn jo jen go etohko ji Esowo, eji n l'k'jo lim ji kp'koro agubjing enyahne.

¹⁷ Tibre ntir nyi ngubjing limm ana ntir nyi etohko. Ntir nyi etohko limm ana ntir nyi ngubjing. Bo li go ekv atemtem, owo wahng e n l'k'jo ma lim ji kp-n koro.[‡]

¹⁸ Etohko l'jol ntubesi ewahne, n nehm kpe woomo go elwo ni atahm.

¹⁹ Nsol nyi ngubjing eblenng e gbuul, ana erehbe, as'sa, nsol nyi ki li saang, elfamme yanng e,

²⁰ eblom ajomo, ntaane alimi, ekv akoko, ntaange ataange, ala ateele, eltim arake, eltiiri elne elne, ny'yabe, eljolo go nlong a nlong,

²¹ amahr abaare, ane awulu, amahm awoko fere jo b'buumu, nkak alimi nyi kpo jen a abi-afem, a nsol nyindiki nyi tob li ana fvfo. N kp-n rehke ana m ma-n tohko rehke wuku wuku. Tibre ane ba l'jo lim elkohn nsol nyia nehm li etul bi Esowo. §

[†] **5:13 5:13** 1 Kor 10:23-24; 1 Pit 2:16 [‡] **5:17 5:17** Rom 7:15,23

§ **5:21 5:21** 1 Kor 6:9-10; Ef 5:5; Ell 22:15

²² Akab nya etohko nya a, elkoro, eyebatahng, elkoono, elkpuumu, eljini anobo, nnoobo alimi, eltaame,

²³ eljolo soom, a elbobo ni nne bahke jo bob elne.* Ntahm anyehng anyehng limm, nyi kpo sahde nsol nyia.†

²⁴ Ane ba li ka Kraist Jisos, bobkum agubjing ebo go ekros, a nsol nyi kpo melle ane go eltim, go nsol nyi kpo sahb k'kor bo go ellimi.‡

²⁵ Ana Etingi Etohko ma-r ka elkpin, nong, wahr tob jenen a ne.§

²⁶ Nong, wahr k'jo geere kak nsol nyi ki li ejumjum, fere jo seb atemtem aweele, fere jo baare amahr go nsol atem.

6

Ana nne bahke jo sol elsol ni ntem

¹ Abonanee, nne l'gbo yel go elkohn abiafem anehng anehng, wahn ji kp'jene go etohko ji Es-owo, kaken ye ebo go enange bem, eji á l'tuungu yiimi, wahn fere baabe elnahne, tohko jol ano, wahn fvfo bahke tob yel go elgaare.*

² Jo solen elsol ni ate ebahne. N l'lim ano, owo m ma bum ntahm nyi Kraist.†

³ Nne awohng awohng no l'tir re, ye nne wo, eji á ki tohko f'foong nne, á kpi elne nehm.

⁴ Nong, nne awohng awohng jo wuungu eltum ene nyehn.‡ Ano wo bahke wahnge á kehm bele

* 5:23 5:23 Ef 5:9 † 5:23 5:23 1 Tim 1:9 ‡ 5:24 5:24 Rom 6:6; Kol 3:5 § 5:25 5:25 Kol 2:6 * 6:1 6:1 Mat 18:15; Jems 5:19-20 † 6:2 6:2 Rom 13:8,10; Gal 5:14; Jems 2:8 ‡ 6:4 6:4 2 Kor 13:5

ejum ji á bahke jo wor nnyo kunu. Bahke jolo eltum ni yefono antahng, nehm jol ni nne noko ma lim.

⁵ Tibre nne awohng awohng bahke solo elsol n'ne antahng. §

⁶ Nong, nne no bo kp-e tibi alum Esowo jo tob yehke go anoobo nsol kpee nya á kpi no, ka nt'tibi ewe.*

⁷ Kana nehm elnahne! Esowo kpehme taame re, nne jv-e nnyo. Tibre ejum ajehng ajehng ji nne l'bahm, j'nehm ji á bahke kpake.

⁸ Nne no l'bahm nsol enye go egbe jio ji ngubjing enye, á bahke kpake elranng. Nne no l'bahm go egbe jio ji etohko, á bahke kpake elkpin ni li go njinanjini. †

⁹ Nong, wahr k'lahng go nnoobo alimi. Tibre ngare l'biingi, e bahke kpake, e tohko yini ekpu.

¹⁰ Anv, eji e kpi eyake, nong, wahr jo lim nnoobo ka nne awohng awohng, asehngesehng ane ba e kp'jene ano a bo go mbang nyi Esowo. ‡

Es'kohro erehke

¹¹ Nyehnen alum gbalee nya n nyono no go egame ebo antahng.

¹² Ane ba kpo tib elbo, fere jo wor nnyo kunu nsol nyi li ka ngubjing, bo ba li ane ba kp'sebe re bo bob-n, yehke nrur. Bo kpo lim ano, eji ane l'k'nohk bo tib ekros ji Kraist. §

¹³ Jol ane bao ba ma yehke nrur kpehme bum atahm.* Bo kp'sebe re wahn yehke nrur, eji bo

§ 6:5 6:5 Rom 14:12 * 6:6 6:6 1 Kor 9:13-15 † 6:8 6:8 Rom 8:13 ‡ 6:10 6:10 Jon 17:21 § 6:12 6:12 Fil 3:18 * 6:13 6:13 Jon 7:19

l'jo wor nnyo kunu ejum ji rí ma lim go egahne agubjing.†

¹⁴ Me n nehme seb re me n wor nnyo kunu ejum ajehng ajehng, sehngem ekros ji Jisos Kraist Ntul ewahre ji m bahke jo wor nnyo kunu, ji ji wahnge njini li-m ana ekpakv ejum, me n li ana nne no ma kpo, yaame a njini.

¹⁵ Afi nne yehke nrur, afi á yehkem, ejumjum o limm. Ji li no li re, á jol nne a nfenfe.‡

¹⁶ Nong, elkoono, a ndon nyi Esowo jol a ane ba kp'toono eljini nia, bo ji li Israel jio ji Esowo.§

¹⁷ Bomo anv asongo, nong, nne awohng awohng ki-m kpe jo gbiingi. Tibre n kpi nliingi nyi Jisos go egama ngubjing.*

¹⁸ Abonanee, nong, nnoobo nyi Jisos Kraist Ntul ewahre jol a atohko enyahne. Emen.

† **6:13 6:13** Mat 23:15 ‡ **6:15 6:15** 1 Kor 7:19 § **6:16 6:16** Rom 9:6 * **6:17 6:17** 2 Kor 11:24-25

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4